

lis Gnovis

■ **MONFALCON.** Procès di Economie solidarie

Il 1 di Març, li dal «lal» di Monfalcon, al partis un cors di 30 oris sui «Procès inovatîfs di Economie solidarie» (www.ialweb.it/corsi/PROCESSI-INNOVATIVI-DI-ECONOMIA-SOLIDALE-69534#tab1). Il percors formatif, finanziât dal «Fondo sociale europeo», al smire di tirâ dongje massimementri zovins indotorâts e specializâts tes sciencis sociâls, leâts cu la rêr regionâl dai Bens comuns e de Economie solidarie e che a vebin fat esperiencis che a jentrin te progjetualitât de leç regionâl 4/2017. Il cors, coordinât di Fabio Eramo (fabio.eraimo@ial.fvg.it - 0481 414219), al vignarà fat tal «Europalace» di strade Cosulich 20, a Monfalcon.

■ **MANIÀ.** Un jutori pe montagne

Ancje l'Ecomuseu dal Friûl occidentâl «Lis Aganis» al à decidût di prudelâ il progjet dal libri solidari di Luca Vivian. Cui che al compre il volum electronic «Un anello tra le Dolomiti Friulane», paiant su la rêr des rêts 5

euros, al destine 1 euro a la racuete «Salviamo le montagne di Nord Est», inviade dal «Club alpino italiano» per regolâ i trois e i ripârs fiscâts de Montane dai Sant dal 2018. Il progjet al è presentât dal autôr, a la direzion informatiche: www.lucavivan.com/anello-dolomiti-friulane-libro/.

■ **GURIZE.** Si prepare la Fieste de Patrie dai 3 di Avrîl

Par celebrâ la «Fieste de Patrie dal Friûl», la Regjon e spindarà 50 mil euros. Il finanziament al sarà amministrât de Agjenzie pe lenghe furlane «ARLeF», che e varà di

destinâ 7 mil e 500 euros al Comun di Gurize, che al inmanearà lis manifestazions regionâls dai 7 di Avrîl; 7 mil e 500 euros a laran pe promozion de fieste; e 35 mil euros par finanziâ duçj i Ents locâi che a curaran iniziatis previodudis tun regolament di pueste pe valorizazion de lenghe, de storie e de culture regionâl e pal coinvolziment de zoventût.

■ **UDIN.** Il premi dal amôr

Ancje chest an, la «Accademia Città di Udine» e à spietât la fieste di San Valantin, protetôr dai innamorâts, par presentâ il concors leterari internazionâl «Premio Romeo e Giulietta Savorgnan». Lis oparis anonimis a varan di rivâ li de segretarie dentri dai 15 di Mai, ancje par pueste electroniche. Il regolament, che si cjatilu su la rêr (www.accademiaccittadiudine.org), al stabilis la division in 5 sezions: poesis par talian; poesis par furlan voltadis ancje par talian; contis par talian; poesis e contis par talian e par furlan di zovins sot dai 18 agns; poesis intune lenghe foreste voltadis ancje par talian. La partecipazion par duçj, fûr che pai zovins, e coste 10 euros.

Joibe 14	S. Valantin	Lunis 18	S. Tarasi
Vinars 15	S. Faustini	Martars 19	B. Conrât
Sabide 16	S. Juliane	Miercus 20	S. Leon vescul
Domenie 17	S. Martars di C.	Il timp	Zornadis di soreli.



Il soreli
Ai 13 al iève aes 7.14
e al va a mont aes 17.30.



La lune
Ai 19 lune plene.

Il proverbi
Chel che al po nol va a cjoli
la aghe tal zeî.

Lis voris dal mès
Se il teren nol è glaçât, su pues plantâ salvie,
tim, maiorane, rosmarin.

Jù lis mans de aghe

La Regjon no pues
cedi devant da la
speculazion private

Ason passâts 8 agns e 6 guviers dal referendum «Aghe Ben comun», ma la gestion partecipative e libare dal condizionament dai profits privâts de aghe di bevi, bramade di 27 milions di talians vie pal 2011, e reste ancjemò un insium. Ancje la leç di iniziative populâr, firmade di 400 mil eletôrs vie pal 2007, che e veve tomât a començâ il so iter parlamentâr tal mès di Otubar di an passât, e stente a lâ indevant.

Ma il puest e il pès dai profits privâts, che a risultin la menace plui grivie tal câs dal «Servizi idric integrât», a son il pericol principâl ancje tal câs dal dibatiment sui criteris par ameti gnovis concessions idroelettrichis su lis aghis de Patrie. A son une sglavinade, di fat, lis impresis privadis che a golosin lis contribuzions publichis previodudis pai produtôrs di energiis rinnovabilis, ancje tal câs di implants cun potencis minimis e duncje cun beneficis ecologicis insignificants.

La cuistion e je tomade di atualitât cuant che il Consei regionâl si è confrontât su la mozion, presentade dal «Patto per l'Autonomia» e firmade ancje di Luca Boschetti («Lega»), di Ilaria Dal Zovo e Cristian Sergo («M5S») e di Furio Honsell («Open Fvg»). Giampaolo Bidoli e Massimo Moretuzzo dal «Pat», cjapant sù lis rivendicazions dai Comitâts che di un ôr a chel altri de region a pretindin la fin des speculazions privadis sui rius alpini, a àn proponût une «moratorie» par fermâ la concession di gnovis derivazions pal ûs idroelettric e par blocâ la realizazion di implants idroelettrichis sun dutis lis aghis naturâls tal teritori regionâl. Cun di plui, a àn domandât di inviâ un confront tecnic par scrutinâ dapardut la aplicazion dal deflûs ecologic. Il dibatiment dal Consei di Triest al è stât anticipât di une manifestazion, ai



Somplât: la centrâl che e sfrute lis aghis cjargnelis pal profit de «Multiutility» lombarde «a2a»

In Friûl a
funzionin
za 228 centrâls
idroelettrichis
e par altris
11 e je stade
domandade
la autorizazion

26 di Zenâr a Udin, dulà che i quartevôs des Comunitâts dai Cjanâi de Pesarine e dal Cjarsò, de Val dal Lâc dai Trê Comuns, di Lusniz e di Fusinis te Val Cjanâl e dal Bacin montan dal Tiliment, cun «Legambiente», a àn tornât a bati che il bloc des concessions al è necessari fin cuant che no sarâ fate la note des aghis che si scuén difindi pal alt valor ambientâl; che no saran stabilis il numar des captazions, i ponts di derivazion e di restituzion, i volums di aghe derivabil e il deflûs vital minim di molâ tes aghis dulà che si podarès fâ implants idroelettrichis gnûfs; che no sarâ garantide une prioritât te siele dal concessionari, privilegiant Comuns, Cooperativis locâls, Ents publics locâi e imprenditôrs locâi che si impegnin a doprâ la energjie in ativitâts locâls; che nol sarâ inmaneât un «fondo di rotazione a tasso agevolato» finanziât ancje dai grancj derivatôrs che a àn fat profits grandons cu lis aghis regionâls.

L'assessor regionâl al ambient, Fabio Scocimarro, devant dal Consei te riunione dai 31 di Zenâr, al à sostignût la impossibilitât tecniche di adotâ une

«moratorie», ma al à garantît il so impegn e chel de strutture tecniche regionâl par fâ un monitorament puntuâl e rigorôs di dutis lis praticis di concession bielzà inviadis, in spiete dal decret interministeriâl che al scancelarà la incentivazion pai mini implants idroelettrichis, stant che a causonin dams ambientâi spropositâts a pet di une contribuzion energetiche minime.

Mario Zili

Messe par furlan

Ancje a Udin, une volte par setemane, si cjante Messe par furlan. La liturgjie eucaristiche de domenie e ven celebrade te vilie de fieste, ogni sabide a 18, li de capele «de Purità» (cun Radio Spazio che le trasmet sul moment). Sabide ai 16 di Fevrâr, al cjantarà Messe pre Carlo Dorligh. E compagnarà la celebrazion la corâl di Cjasteons di Muris.

Peraulis in dismentie par cure di Mario Martinis

❖ **BURÌ**

v. = scovare, scoprire
(dal longobardo burjan, ma si pensa anche all'onomatopeico *borr, *brr che imita l'abbaiare del cane che insegue la selvaggina)
A fuarce di cirî o ai buride fûr la bolete de lûs che nus covente.
A forza di cercare ho scovato la bolletta della luce che ci occorre.

❖ **BURIDE**

avv. = di corsa, con irruenza
(dal verbo burî "scovare, far levare la selvaggina", proveniente dal longobardo burjan, ma si pensa anche all'onomatopeico *borr, *brr che imita l'abbaiare del cane che insegue la selvaggina)
Il cjan al è lâ di buride daûr dal jeur.
Il cane ha inseguito di corsa la lepre.

❖ **BUSINÂ**

v. = rumoreggiare; ronzare; gridare a voce alta
(dal verbo latino bucinare 'suonare la tromba')
Al busine il vint di tramontane.
Rumoreggia il vento di tramontana.
Al è di vuê a buinare che mi busine une orele.
È da stamattina che mi ronza un'orecchio.

❖ **BURLAÇ**

s.m. = temporale
(dal verbo burlâ 'rombare, rumoreggiare' probabilmente, ma si pensa anche collegato a significato 'rotolare, cader giù')
Cir di fâ di corse parceche al rive un biel burlaç.
Cerca di fare in fretta perché arriva un bel temporale.

❖ **BUSSÂ**

v. = baciare
(dal verbo busâ "baciare", secondo alcuni studiosi ha una base germanica, molto probabilmente il medio alto tedesco buss, butsch; è da confrontare con la voce basium "bacio" già presente nel latino popolare di probabile origine celtica;)
Luise e busse Indri sot il cil stelât.
Luisa bacia Enrico sotto il cielo stellato.

❖ **BUTAÇ**

s.m. = bariletto, bottaccio; orecchioni, parotide
(da bôte "botte", proveniente da latino bûtis, con il suffisso -aç)
Met tal butaç il vin e quartilu a to pari intal ronc.
Metti nel bariletto il vino e portalo a tuo padre nella vigna.
Cjol la medisine cussî tu vuarissis dal butaç.
Prendi il medicinale così guarisci dagli orecchioni.